

四庫全書

集部

欽定四庫全書

集部

蘇詩補註卷四

詳校官庶吉士_臣李傳熊

檢討_臣何思鈞覆勘

總校官原任中允_臣王燕緒

校對官中書_臣牛稔文

謄錄監生_臣范廷驊

欽定四庫全書

蘇詩補註卷四

翰林院編修查慎行撰

古今體詩三十八首

嘉祐八年癸卯
在鳳翔任作

和子由踏青

東風陌上驚微塵，遊人初樂歲華新。
人閒正好路旁飲，麥短未怕遊車輪。
城中居人厭城郭，喧闐曉出空四鄰。
歌鼓驚山草木動，簞瓢散野鳥鳶馴。
何人聚衆稱道人，遮道賣符色怒嗔。
宜蠶使汝繭如壑，宜畜使汝羊如麇。

路人未必信此語強為買服襌新春道人得錢徑沽酒
醉倒自謂吾符神

踏青

子由詩序云眉之東門十數里有山曰墓願山上有亭榭松竹山下臨大江每正月八日士女相

與遊嬉飲酒於其上謂之踏青陸放翁詩云只怪今朝空巷出使君人日宴墓願名勝志墓願山在江東七里至有至德觀人日出東郊渡江遊墓願眉之故事也據二說踏青乃人日事非八日也八日恐訛李綽歲時紀上巳日都人於曲江禊飲踏青草曰踏青劉禹錫詩昭君坊中多女伴永安宮外踏青來則踏青之俗所在皆然不獨眉州也

附子由原作

原題云記歲首鄉俗寄子瞻二首

江上冰消岼草青三三五五踏青行浮橋沒水不
勝重野店壓糟無復清松下寒花初破萼谷中幽
鳥漸嚶鳴洞門泉脉龍睛動觀裏丹池鴨舌生山
下耕罌沾穉孺峰頭鼓樂聚簪纓縞裙紅袂臨江
影青蓋驕騶踏石聲曉去爭先心蕩漾暮歸誇後
醉縱橫最憐人散西軒靜曖曖斜陽著樹明

和子由蠶市

蜀人衣食常苦艱蜀人遊樂不知還千人耕種萬人食

一年辛苦一春閒閒時尚以蠶為市恐忘辛苦遂欣歡
去年霜降斫秋菽今年箔積如連山破瓢為輪土為釜
爭買不啻金與紉憶昔與子皆童邛年年廢書走市觀
市人爭誇鬪巧智一作智巧野人喑啞遭欺謾詩來使我感
舊事不悲去國悲流年

箔

詩經八月萑葦
注曲薄即箔也

蠶市

王氏注引子由詩序云眉之
二月望日鬻蠶器於市因作

樂縱觀謂
之蠶市

附子由原作

枯桑舒芽葉漸青新蠶可浴日清明前年器用隨
手敗今冬衣着及春營傾困計口賣餘粟實箔還
家待種生不惟箱篚供婦女亦有鉏耨資男耕空
巷無人鬪容治六親相見爭邀迎酒肴勸屬坊市
滿鼓笛繁亂倡優擰蠶叢在時已如此古人雖沒
誰敢更異方不見古風俗但向陌上聞吹笙

次韻子由論書

吾雖不善書曉書莫如我苟能通其意常謂不學可貌

妍容有曠壁美何妨檐端莊雜流麗剛健含婀娜好之每

自譏不獨子亦頗書成輒棄去繆被旁人裹體勢

一木作皆云

本潤落結束入細麼子詩亦見推語重未敢荷邇來又學

射力薄愁官箚

公自注官箚十二把吾能十一把箭耳

多好竟無成不精安用

夥何當盡屏去萬事付懶惰吾聞古書法守駿莫如跛世

俗筆苦驕衆中強鬼駭

此下少韻

鍾張忽已遠此語與時左

論書

韻語陽秋東坡與子由論書云云其子叔黨跋公書云吾先君子豈以書自名哉特以其至大

至剛之氣發於胸中而應之以手不見其刻畫嫵媚之態而章甫端冕若有不可犯之色少年喜二王晚

乃喜顏平原故時有二家風氣俗子不知妄謂學
徐浩陋矣觀此則知初未嘗規規於翰墨積習也莫

如我

公羊傳葵邱之會桓公震而矜之
叛者九國矜之者何猶云莫若我也
贖莊子西施

按贖與
海外紀趙子固云徐會稽之濁在跛偃李北
顰同 跛海之濁在歌邪跛偃之弊流為東坡歌邪

之弊流為
元章父子 鍾張孫過庭書譜敬之不及逸少猶逸少
之不及鍾張羊欣古來能書名人錄

穎川鍾繇魏太尉書有三體弘農
張芝高尚不仕善草書精勁絕倫

慎按子由原作凡十五韻先生和詩脫去鎖

字止十四韻諸刻本皆同無善本考補殊為

缺事

附子由原作

樂城集題云子瞻
寄示岐陽十五碑

堂上岐陽碑吾兄所與我吾兄自善書所取無不
可歐陽弱而立商隱瘦且橢小篆妙詰曲波字美
婀娜譚藩居顏前何類學顏頗魏華自磨淬峻秀
不包裹九成列賢俊磊落雜么麼英公與褒鄂戈
戟聞自荷何年學操筆終歲惟箭筈書成亦可愛
藝業嗟獨夥余雖謬學文書字每慵惰車前駕騏
驎車後繫羸跛逾年學舉足漸亦成駉駉古人有

遺蹟篋短不及鎖願從兄發之洗硯處兄左

記所見開元寺吳道子畫佛滅度以答子由

次原韻

西方真人誰所見衣被七寶從雙趺

音酸

當時修道頗辛

苦柏生兩肘烏

一作鳥

巢肩初如濛濛隱山玉漸如濯濯

出水蓮道成一旦就空滅奔會四海悲人天翔禽哀響

動林谷獸鬼躑躅泪迸泉龐眉深目彼誰子繞牀彈指

性自圓隱如寒月墮清晝空有孤光留故躔春遊古寺

拂塵壁遺像久此霾香烟畫師不復寫名姓皆云道子

口所傳縱橫固已茂孫鄧有如巨鰐吞小鮮來詩所誇
孰與此安得攜挂其旁觀

開元寺吳畫

印氏開見後錄鳳翔開元寺大殿九間後壁吳道玄畫自佛始生修行說法及

寂滅度山林宮室人物禽獸數千萬種如佛滅度比丘衆踴踊哭泣皆若不自勝者雖飛鳥走獸亦作號頓之狀獨菩薩淡然不動如平時畧無哀戚之容豈以其能盡生死之致者歟其識開元三十年云曹學佺謂吳畫在普門
佛滅度釋迦氏譜世尊入初禪二
定從定起已入涅槃於是大地震動幽冥大明諸比丘等悲慟頌絕阿耶律告止諸天滿空比丘等悲號
接擾恐有怪責既
西方真人列子仲尼篇西方之人謂之聖者李知幾云意
聞此喻互相裁抑

其說
佛也
七寶

七寶有二種一者七種珍寶二者七種王寶七種珍寶者無量壽經云金銀琉璃玻

璆珊瑚瑪瑙碑礪恒水經云金銀珊瑚瑪瑙真珠碑明月珠摩尼珠七種王寶者華嚴經注一金輪寶二象寶三紺馬寶四神珠寶五主藏臣寶六玉女寶七兵主臣寶得是七寶於閻浮提作轉輪王

附子由原作

樂城集題云畫文殊普賢

誰人畫此二菩薩趺坐花心乘象狻弟子先後執

孟岳老僧槎牙森比肩山林修道幾世劫顏貌偉

麗如開蓮重崖宛轉帶林樹野水荒蕩浮雲天峨

眉高處不可上下有絕澗錮九泉朝陽未出白霧

起有光燭天如月圓靈仙居中粗可識有類白兔
依清蹕遊人禮拜千萬萬迤邐漸遠如飛烟五臺
不到想亦爾今之畫圖誰所傳吾兄子瞻苦好異
敗繒破紙收明鮮自從西行止得此試與記錄代
一觀

和子由寒食

寒食今年二月晦樹林深翠已生烟遶城駿馬誰能借
到處名園意盡便但挂酒壺那計盞偶題詩句不須編

忽聞啼鴟驚羈旅江上何人治廢田

寒食

後漢周舉傳太原一郡俗以介子推焚骸有龍忌之禁至其亡月咸言神不樂舉火由是士民

每冬中輒一月寒食莫敢相鬻舉為并州刺史乃作帛書置子推廟言盛冬去火殘損民命非賢者意宣示愚民使還溫食於是衆惑稍解然則漢以前寒食乃在冬中不在二三月間也汝南先賢傳太原舊俗以介子推焚骸一月寒食亦不言在春惟鄴中記云并州冬至後一百五日為介子推斷火冷食三日後世以清明前一日為寒食節本此

附子由原作

樂城集題云寒食前一日寄子瞻

寒食明朝一百五誰家冉冉尚厨烟桃花開盡葉

初綠燕子飛來體自便
愛客漸能陪痛飲讀書無
思懶開編秦川雪盡南山出
思共肩輿看麥田

中隱堂詩

并序

岐山宰王君紳其祖故蜀人也避亂來長安而遂家
焉其居第園圃有名長安城中號中隱堂者是也予
之長安王君以書戒其子弟邀予遊且乞詩甚勤因
為作此五篇

去蜀初逃難遊秦遂不歸園荒喬木老堂在昔人非鑿

石清泉激開門野鶴飛退居吾久念長恐此心違

岐山

元和郡縣志岐山縣本雍縣地太平寰宇記太王徙於岐山即此岐山在縣東北十里西至鳳

翔府五十里

王紳

字正叔見邵氏聞見後錄即中隱堂主人

長安城

賈耽縣道

宋屬鳳翔

記長安縣故城今謂之范城蓋古鄉聚名在渭水南漢于其地築未央宮謂大城曰長安城

昔人

藥城詩注或云此即歸登宅登為唐相詩中昔人指登而言也

徑轉如修蟒坡垂似伏鼇樹從何代有人與此堂高好

古嗟生晚偷閒厭久勞王孫早歸隱塵土汙君袍

二月驚梅晚幽香此地無依依慰遠客皎皎似吳姝不

恨故園隔空嗟芳歲徂春深桃杏亂笑汝益羈孤

翠石如鸚鵡何年別海孺來

一作貢

隨南使遠載壓渭舟

偏已伴喬松老那知故國遷金人解辭漢汝獨不潛然

金人

史記武帝本紀又作柏梁銅柱承露仙人掌之屬矣李賀有金人辭漢歌

都城更幾姓到處有殘碑古隧埋蚪蚪崩崖露伏龜安
排壯亭榭收拾費金貲岫嶠何須到韓公浪自悲

岫嶠

湘水記衡山南有岫嶠峰東西七十里南北三十里高一千五百丈禹登此得金簡玉牒治水

之書其山上承翼宿提轄鈞鈴故名岫下据離宮攝
統火維故曰嶠名勝志岫嶠峰在衡州城西三十五

里上有禹治水碑皆蝌蚪文字昔樵者見之自
後無有見者韓愈岫嶠山詩森森綠樹猿猱悲

附子由次韻五首

秦中勝岷蜀故國不須歸
甲第春風滿巴山晝夢
非竹深啼鳥亂花落晚蜂飛
我欲西還去敲門慎
勿違

官去空留鶴山浮不見鰲
竹林迎日淨槐木擁亭
高鳥噪知人至蟬鳴覺口勞
誰能飲堂上解帶不
穿袍

唐朝卿相宅此外更應無請看庭前樹曾攀屋裏
姝流傳漸失實遺老不禁徂試問歸登物林間翠
石孤

愛君高堂上有似蜀江孺牆外終南近簷西太白
偏晚梅晴自媚老竹暗相遷未到遙聞說吾廬安
得然

君看原上墓墳盡但餘碑誰見生前貴塵生帶下
龜高堂幸有酒一飲豈論貧強勉行樂耳古人良

可悲

次韻子由彈琴

外集題云次韻子由以詩見報編禮公借雷琴記舊曲

琴上遺聲久不彈
琴中古義本長存
苦心欲記常迷舊

信指如歸自看痕
應有仙人依樹聽
空教瘦鶴舞風騫

誰知千里溪堂夜
時引驚猿撼竹軒

公自注過終南令道士趙宗有彈琴

溪堂

附子由原作

樂城集題云大人久廢彈琴比借人雷琴以記舊曲十得三四率爾拜呈

久廢凡桐不復彈
偶然尋繹尚能存
倉庚鳴樹思

前歲春水生波滿舊痕泉落空巖虛谷應珮敲清
殿百官騫終宵竊聽不能學庭樹無風月滿軒

次韻和子由欲得驪山澄泥硯

澄一作沉

舉世爭稱鄴瓦堅一枚不換百金頒豈知好事王夫子
自採臨潼繡嶺山經火尚含泉脉暖弔秦應有淚痕潛
封題寄去吾無用近日從戎擬學班

澄泥硯

硯譜號州澄泥唐人品硯以為第一又米芾硯史云相州土人自製陶硯在銅雀上以熟

絹二重陶泥澄之取極細者煑為硯有色綠如春波者又云號州石細理如泥發墨不滲驪山澄泥無可

考疑即號州業瓦胡仔茗溪叢話銅雀臺瓦硯以古石也俟再考

及寸者印工姓氏皆分隸書鄴中記魏武于銅雀園立三臺太平寰宇記三臺銅雀中臺也金虎冰井南臺北臺也名勝志曹魏都鄴于城北造銅雀臺日久臺廢土人掘地得瓦以為硯貯水數日不滲臨

潼繡嶺

輿地廣記陝西永興軍路京兆府臨潼縣本驪戎國驪山在南漢新豐唐慶山宋祥符八

年改臨潼程大昌雍錄臨潼縣秦驪邑也山海經驪山左右皆峻嶺雲霞繡錯固有繡嶺之名

附子由原作

長安新硯石同堅不待書來許見頌豈必魏人勝

近世強推銅雀沒驪山寒梅舒卷開雲葉清露霑

流發涕潛早與封題寄書案報君湘竹筆身斑
次韻和子由聞予善射

中朝鸞鷟自振振豈信邊隅事執鼓共怪書生能破的
也如驍將解論文穿楊自笑非猿臂射隼長思逐馬軍
觀汝長身最堪學定如髯羽便超羣

射隼

易公用射隼於高墉之上

馬軍

杜甫詩洗盥開嘗對馬軍

慎按施注新舊本俱失載此詩今從外集第

三卷補編

附子由原作

舊讀兵書氣已振近傳能射喜征鼙手隨樂節寧
論中箭作鷓鴣聲不害文力薄僅能勝五斗才高應
自敵三軍良家六郡傳真法馬上今誰最出羣

鳳翔八觀

并引

鳳翔八觀詩記可觀者八也昔司馬子長登會稽探
禹穴不遠千里而李太白亦以七澤之觀至荊州二
子蓋悲世悼俗自傷不見古人而欲一觀其遺蹟故

其勤如此鳳翔當秦蜀之交士大夫之所朝夕往來
此八觀者又皆跬步可至而好事者有不能徧觀焉
故作詩以告欲觀而不知者

石鼓歌

冬十二月歲辛丑我初從政見魯叟舊聞石鼓今見之
文字鬱律蛟蛇走細觀初以指畫肚欲讀嗟如箝在口
韓公好古生已晚我今况又百年後強尋徧傍推點畫
時得一二遺八九我車既攻馬亦同其魚維鯁貫之柳

公自注其詞云我車既攻我馬亦同又云其魚維何維
鯉維鯉何以貫之維揚與柳此六句可讀其餘多不可

通

古器縱橫猶識鼎衆星錯落僅名斗模糊半已隱癡

胝詰曲猶能辨跟肘娟娟缺月隱雲霧濯濯嘉禾秀狼

莠漂流百戰偶然存獨立千載誰與友上追軒頡相唯

諾下揖

一作挹

冰斯同穀穀憶昔周宣歌鴻雁當時籀史

變蚪蚪厭亂人方思聖賢中興天為生耆耆東征徐虜

闕號虎北伏

一代伐

犬戎隨指嗾象胥雜沓貢狼鹿方召

聯翩賜圭卣遂因鼓鼙思將帥豈為考擊煩矇眊何人

作頌比嵩高萬古斯文齊岵嶠勲勞至大不矜伐文武
未遠猶忠厚欲尋年歲無甲乙豈有名字記誰某自從
周衰更七國竟使秦人有九有掃除詩書誦法律投棄
俎豆陳鞭杻當年何人佐祖龍上蔡公子牽黃狗登山
刻石頌功烈後者無繼前無偶皆云皇帝巡四國烹滅
强暴救黔首六經既已委灰塵此鼓亦當遭擊掊傳聞
九鼎淪泗上欲使萬夫沉水取暴君縱欲窮人力神物
義不污秦垢是時石鼓何處避無乃天工令鬼守興亡

百變物自閒富貴一朝名不朽細思物理坐嘆息人生

安得如汝壽

鳳翔

元和郡縣志頂羽封章邯為雍王即此地漢為右扶風唐武德中為岐州至德元載改鳳翔郡

乾元中改府東至東京一千一百七十里九域志屬秦鳳路

秦蜀之交

九域志鳳翔府地里

東至京兆府一百七十里西至隴州一百十四里南至鳳州七十五里北至涇州九十里東南至洋州四

百五里西南至鳳州一百三十里東北至邠州六十七里西北至渭州八十里石鼓困學紀聞石鼓

原在天興縣南乃雍縣也太平寰宇記石形如鼓其數有十蓋紀周宣王田獵之事其文即史籀之迹唐

貞觀中蘇易紀其畧云虞褚歐陽共編古妙雖歲久訛缺然尚有可觀名勝志鳳翔縣南有石鼓鎮石鼓

初散陳倉野中韓文公為博士請於祭酒欲興致太學不從後鄭餘慶始遷於鳳翔孔子廟元季移燕京國子監○慎按石鼓文歐陽集古錄始設三疑然前此已多紛紛之說王厚之石鼓文考正云周王之獵碣也韓愈以為宣王鼓韋應物以為文王鼓宣王刻鄭樵以為秦鼓馬定國以宇文泰曾蒐岐陽指為後周物董道曰傳云成有岐陽之蒐杜預謂還歸自奄乃大蒐於岐陽叔向曰昔成王盟諸侯于岐陽楚為荆蠻置茅絕宣王蒐岐陽世遂無聞哉方成康與穆賦頌鐘鼎之銘皆番吾之蹟則此為番吾可知程大昌雍錄亦以為成王鼓自韓蘇詩以為宣王後人無敢有異議者其實按諸左傳及杜注言成王而不及宣王其為成王鼓無疑

指畫肚
陳思書苑菁華鍾繇初師劉德昇後傳蔡邕筆法臨終謂其子

會曰吾積三十餘年行坐未嘗忘若在寢息則畫其被皆為之穿周越法書苑云虞七被中以指畫肚

籀史變科斗

虞世南書旨述史籀循科斗之書采蒼頡古文別署新意號曰籀文書苑菁華

周宣王時史籀始著大篆十五篇世謂之籀書亦曰籀篆石鼓文是也宣和書譜史籀書存者石鼓以其為籀所創故曰籀書以其為太史氏而得名又曰史書石鼓文考正引呂氏紀云蒼頡造大篆後世有科斗書則謂篆為籀書張懷瓘以柱下史始變古文是大篆與籀異不得定為史籀所書也韋續五十六種書體其六為科斗之書因科斗名故飾之以形不知年代或云頽頽所製今古文是也水經注古文出于黃帝之世蒼頡本鳥蹟為字自秦用篆書古文絕矣魯恭王得孔子宅書不知有古文謂之科斗書冰斯吾衍學古篇李陽冰名潮後以字行別字少溫韓斯昌黎蚪蚪書後記云大歷世李監陽冰獨能篆書國史補陽冰工小篆自言李斯之後至小生曹喜蔡邕不足言也按陽冰趙郡人太白之從叔許氏說文

解字序云秦兼天下李斯作蒼頡篇改大篆為小篆書斷云斯小篆入神大篆入妙

附子由和

岐山之陽石為鼓叩之不鳴懸無虞以為無用百
無直以為有用萬物祖置身有用無用間自託周
宣誰敢侮宣王沒後墳壠平秦野蒼茫不知處周
人舊物惟存山文武遺民盡囚虜鼎鐘無在鑄戈
戟宮殿已倒生木黍厲宣子孫竄四方昭穆錯亂
不存譜時有過客悲先王綢繆牖戶徹桑土思宣

不見幸鼓存由鼓求宣近為愈彼皆有用世所好
天地能生不能主君看項籍猛如狼身死未冷割
為脯馬童楊喜豈不仁待汝封侯非怨汝何況外
物固已輕毛擒翡翠尾執麈惟有蒼石於此時獨
以無用不見數形骸偃蹇任苔蘚文字皴剝困風
雨遭亂既以無用全有用還為太平取古人不見
見遺物如見方召與申甫文非蚪蚪可窮詰簡編
不載無訓詁字形汗漫隨石缺蒼蛇生角龍折股

亦如老人遭暴橫頤下髭禿口齒齟形雖不具意
可知有云楊柳貫魴魴豈厭居溪谷自投網
罟入君俎柳條柔弱長百尺挽之不斷細如縷以
柳貫魚魚不傷貫不傷魚魚樂死登之廟中鬼神
格錫汝豐年多黍稷宣王用兵征四國北摧犬戎
南服楚將帥用命士卒驩死生不願闕虢虎問之
何術能使然撫之如子敬如父弱柳貫魚魚弗違
仁人在上民不怒請看石鼓非徒然長笑泰山刻

秦語

詛楚文

公自注碑獲於開元寺土下今在太守便廳秦穆公葬于雍索泉祈年觀下今

墓在開元寺之東南數十步則寺豈祈年之故基耶淮南王遷于蜀至雍道病卒則雍非長安

此乃古雍也

崢嶸開元寺髣髴祈年觀舊築掃成空古碑埋不爛詛書雖可讀字法嗟久換詞云秦嗣王敢使祝用瓚先君穆公世與楚約相捍質之於巫咸萬葉期不叛今其後嗣王乃敢構多難剝胎殺無罪親族遭圍絆計其所稱

訴何啻桀紂亂

公自注秦嗣王至此皆詛楚文中語

吾聞古秦俗面詐背

不汗豈惟公子印社鬼亦遭謾遼哉千載後發我一笑

一作
笑一祭

詛楚文

六一題跋秦祀巫咸神文今流俗謂之詛楚文首述秦穆公與楚成王事遂及楚王熊相

之罪按史記世家自成王以後王名有熊良夫熊適熊槐熊元而無熊相據文言倍十八世之詛盟今以世家考之自成王十八世為頃襄王而祈年觀雍縣頃襄王名橫不名熊疑相傳寫為橫也祈年觀雍縣古牢井秦惠公之所居所謂祈年宮也孝公又謂之橐泉太平寰宇記祈年宮在天興縣漢書地理志扶風雍縣有橐泉宮秦孝公起祈年宮惠公所起又有祈年觀注詳後秦穆公墓詩下

附子由和

詛楚楚如桀詛秦秦則紂桀罪使信然紂語安足
受牲肥酒醪潔夸誕鬼不祐鬼非東諸侯豈信辨
士口碑埋祈年下意繞章華走得楚不付孫但為
劉季取吾聞秦穆公與晉實甥舅盟鄭絕晉歡結
楚將自救使秦詛楚人晉亦議秦後諸侯迭相詛
禍福果誰有世人不知道好古無可否何當投涇
流渾濁蓋鄙醜

王維吳道子畫

何處訪吳畫普門與開元開元有東塢摩詰留手痕吾
觀畫品中莫如二子尊道子實雄放浩如海波翻當其
下手風雨快筆所未到氣已吞亭亭雙林間彩暈扶桑
暎中有至人談寂滅悟者悲涕迷者手自捫蠻君鬼伯
千萬萬相排競進頭如蝨摩詰本詩老佩芷襲芳蓀今
觀此壁畫亦若其詩清且敦祇園弟子盡鶴骨心如死
灰不復溫門前兩叢竹雪節貫霜根交柯亂葉動無數

一一皆可尋其源吳生雖妙絕猶以畫工論摩詰得之於象外有如仙翮謝籠樊吾觀二子皆神俊又於維也
欽祚無間言

王維畫

名勝志王右丞畫竹兩叢交柯亂葉飛動若舞在開元寺東牆

吳道子畫

注詳

本卷開

畫工

唐朝名畫錄太宗幸玄武池見灘鵜召閣立本圖之左右誤云宣畫工立本大

元寺下

耻之遂絕筆戒子弟不令學畫

開元寺

鳳翔府志開元寺在城北街唐開元元年建內有詛楚文

及吳道子畫佛王維畫竹

附子由和

吾觀天地間萬事同一理扁也工斲輪乃知讀文字我非畫中師偶亦識畫旨勇怯不必同要以各善耳壯馬脫銜放平陸步驟風雨百夫靡美人婉婉守閒獨不出戶庭修容止女能嫣然笑傾國馬能一蹶致千里優柔自好勇自強各自勝絕無彼此誰言王摩詰乃過吳道子試謂道子來置汝所挾從軟美道子掉頭不肯應剛傑我已足自恃雄奔不失馳精妙實無比老僧寂滅生慮微待女間

繫非復婢丁寧勿相違幸使二子齒二子遺蹟今
豈多岐陽可貴獨能備但使古壁常堅完塵土雖
積光豔長不毀

維摩像唐楊惠之塑在天柱寺

昔者子輿病且死其友子祀往問之跼蹐鑒井自嘆息
造物將安以我為今觀古塑維摩像病骨磊砢如枯龜
乃知至人外生死此身變化浮雲隨世人豈不碩且好
身雖未病心已疲此叟神完中有恃談笑可却千熊羆

當其在時或問法俛首無言心自知至今遺像兀不語
與昔未死無增虧田翁里婦那肯顧時有野鼠銜其髭

見之使人每自失誰能與詰

別本作結訛

無言師

維摩像

名勝志維摩詰像在鳳翔縣天柱寺為竭摩室示疾者

天柱寺

鳳翔志天柱寺

在鳳翔縣東北唐李洞宿鳳翔天柱寺詩天柱暮相逢吟思天柱峰

附子由和

金粟如來瘦如腊坐上文殊秋月圓法門論極兩
相可言語不復相通傳至人養心遺四體瘦不為

病肥非妍誰人好道塑遺像鮐皮束骨筋扶咽兀
然隱几心已滅形如病鶴聳兩肩骨節支離體踈
緩兩目視物猶炯然長嗟靈運不知道強翦美須
挿兩顴彼人視身若枯木割去右臂非所患何況
塑畫已身外豈必奪爾庸自全真人遺意世莫識
時有游僧施鉢錢

東湖

吾家蜀江上江水清如藍爾來走塵土意思殊不堪况

當岐山下風物尤可慙有山禿如赭有水濁如泔不謂
郡城東數步見湖潭入門便清奧恍如夢西南泉源從
高來隨波走涵涵東去觸重阜盡為湖所貪但見蒼石
螭開口吐清甘借汝腹中過胡為目眈眈新荷弄晚涼
輕棹極幽探飄飄忘遠近偃息遺珮簪替同深有龜與魚

一作魚
與龜

淺有螺與蚌曝晴復戲雨戢戢多於蠶浮沉無

停餌倏忽遽滿籃絲緡雖強致瑣細安足戢聞昔周道
興翠鳳依孤嵐飛鳴飲此水照影弄毳毳

公自注此古
飲鳳池也

至今多梧桐合抱如彭聃彩羽無復見上有鸛搏鷁嗟
予生雖晚好古意所耽圖書已漫漶猶復訪僑郅卷阿
詩可繼此意久已含扶風古三輔政事豈汝諳聊為湖
上飲一縱醉後談門前遠行客刼刼無留驂問胡不回
首毋乃趁朝參予今正踈懶官長幸見函不辭日游再
行恐歲滿三暮歸仍倒載鐘鼓已齟齬

東湖

鳳翔志在縣東門外鳳泉自北繞城南流名勝志東湖在鳳翔城東雍渭二水所溢今城介于

東北二

翠鳳孤嵐

太平寰宇記岐山亦名天柱山周之興也鶯鶯鳴於山上

古三

輔

元和郡縣志鳳翔為貢雍州之域秦屬內史漢景帝時更名主爵都尉武帝太初元年改右扶風與

京兆尹左馮翊謂之三輔初共治長安城中至後漢扶風出理槐里即今興平縣東南七里槐里城是也施

氏補注以
為楓里訛

附子由和

不到東湖上但聞東湖吟詩調已清絕佳境亦可

尋蜿蜒蒼石螭蟠拏據湖心倒腹吐流水奔注為

重深清風蕩微波渺渺平無音有鼈行在沙有魚

躍在潯鼈圓如新荷魚細如蠹蟬梧桐生兩涯蕭

蕭自成林孫枝復生孫已中瑟與琴秋蟲噪蜩蛭
春鳥鳴鳩鶯有客來無時濯足蔭清陰自忘府中
官取酒石上斟醉倒卧石上野蟲上其襟醒來不
知暮湖月翻黃金油然上馬去縱意不自箴作詩
招路人行樂宜及今人生不滿百一瞬何所任路
人掉頭笑去馬何駸駸子有不肖弟有冠未嘗簪
願身化為線使子為之鍼子欲烹鯉魚為子漑釜
鶯子欲枕山石為子求布衾異鄉雖云樂不如反

故岑瘦田可耕鑿桑柘可織絰東有軒轅泉隱隱
如牛泔西有管輅宅尚存青石碁彭女留膝踝禮
拜意已欽慈姥抱衆子亂石寒森森朝往暮可還
此豈不足臨慎勿語他人此意子獨諶

真興寺閣

山川與城郭漠漠同一形市人與鴉鵲浩浩同一聲此
閣幾何高何人之所營側身送落日引手攀飛星當年
王中令斫木南山蘓寫真留閣下鐵面眼有稜身強一作

長八九尺與閣兩崢嶸古人雖暴恣作事今世驚登者尚呀喘作者何以勝曷不觀此閣其人勇且英

真興寺閣

鳳翔志真興寺閣宋節度使王彥起建在城中高十餘丈

王中令

宋史王彥

起臨清人歷後唐晉漢至周祖革命遷節度顯德中累功加侍中歷永興軍節度移鎮鳳翔宋初加中書令代還太宗朝封鄆國公致仕

附子由和

秦川不為廣南山不為高嵯峨真興閣傑立陵風
颺危檻俯翔鳥跳簷落飛猱上有傲世人身衣白

鶴毛下視市井喧奔走何嗷嗷蕭然倚楹嘯遺響
入雲霄清風吹其裾冉冉不可操不知何所為豈
即非盧敖遊目萬里間遠山如伏羔遺語謝世俗
釣魚當釣鰲

李氏園

公自注李茂貞園
也今為王氏所有

朝遊北城東回首見脩竹下有朱門家破牆圍古屋舉
鞭叩其戶幽響答空谷入門所見夥十步九移目異花
兼四方野鳥喧百族其西引溪水活活轉牆曲東注入

深林林深窗戶綠水光兼竹淨時有獨立鵲林中百尺
松歲久蒼鱗蹙豈惟此地少意恐關中獨小橋過南浦
一作
圖夾道多喬木隱如城百雉挺若舟千斛陰陰日光

淡黯黯秋氣蓄盡東為方池野雁雜家鷺紅梨驚合抱
映島孤雲馥春光水溶漾雪陣風翻撲其北臨長谿波
聲卷平陸北山卧可見蒼翠間磽砢我時來周覽問此
誰所築云昔李將軍負險乘衰叔抽錢筭間口但未摧
羹粥當時奪民田失業安敢哭誰家美園囿籍沒不容

贖此亭破千家鬱鬱城之麓將軍竟何事蟻蟲生刀韜

何嘗載美酒來此駐車轂空使後世人聞名頸猶縮

自公

注俗猶呼皇后園蓋茂貞謂其妻也我今官正閒屢至因休沐人生營居

止竟為何人卜何當辨一身永與清景逐

李茂貞

按五代史李茂貞于唐昭宗時以鳳翔節度封岐王終梁世奉唐正朔及唐莊宗滅梁茂

貞上箋猶稱岐王其後乃改封秦王氏

奪民田

按五代史

注謂昭宗景福元年進封秦王者訛

稱茂貞居岐寬仁愛物民頗安之又稱其子從曦有田千頃竹千畝在鳳翔懼侵民利未嘗省理鳳翔人愛之似不應有奪田籍圖之事而江鄰幾雜志謂茂貞幽昭宗于紅泥院自據使宅民獻善田薄租以佃

之稱秦王戶後子孫以券收田府西土腴各百餘頃
不十年蕩盡與先生詩脗合意其奪田開園乃唐末
事其後既為世土則市小惠以結民心亦奸雄之故
智東坡身至鳳翔所見必真故詩云云可補史傳之
缺

皇后園

五代史唐亡諸侯之强者皆相次稱帝獨
茂貞不能但稱岐王開府置官屬以妻為

皇后鳴梢羽扇視朝
出入擬天子而已

附子由和

有客騎白駒揚鞭入青草悠悠無遠近但擇林亭
好蕭條北城下園號李家媪繫馬古車門隨意無
灑掃鳴禽驚上屋飛蝶紛入抱竹林淨如濯流水

清可澡間花不着行香梨獨依島松枝貫今昔林
影變昏早草木皆蒼顏亭宇已新造臨風置酒尊
庭下取栗棗今人強觀笑古人已枯槁欲求百年
事不見白鬚老秦中古云樂文武在豐鎬置園通
樵蘇養獸讓麀麋池魚躍金碧白鳥飛紵縞牛羊
感仁恕行葦亦自保當年歌靈臺後世咏魚藻古
詩宛猶在遺處不可考悲哉李氏末玉霸出奴早
城中開芳園城外羅戰堡擊鼓鳴巨鐘百姓皆懊

惱及夫聖人出戰國卷秋潦園田賦貧民耕破園
前道高原種菽粟陂澤滿杭稻春耕雜壺漿秋賦
輪結橐當年王家孫自庇無尺椽空餘百歲木妄
為妖巫禱遊人足譏罵百世遭舌討老翁不願見
垂涕祝襁褓持用戒滿盈飲酒無醉倒

秦穆公墓

橐泉在城東墓在城中無百步乃知昔未有此城秦人
以泉識公墓昔公生不誅孟明豈有死之日而忍用其

良乃知三子殉公意亦如齊之二子從田橫古人感一飯尚能殺其身今人不復見此等乃以所見疑古人古人不可望今人益可傷

穆公墓

羅璧識遺云穆公葬橐泉祈年觀程大昌雍錄劉向言穆公葬無丘壟處矣惠公孝公並

是繼世之君子孫無由起宮于祖宗之墳陸惟三輔黃圖謂祈年觀穆公所造

橐泉

鳳翔志橐泉在

城內東南隅秦穆公建宮于上

三子

括地志三良塚在雍縣南一里故城內

附子由和

泉上秦伯墳下埋三良士三良百夫特豈為無益

死當年不幸見迫脅詩人尚記臨穴惴豈如田橫
海中客中原皆漢無報所秦國吞西周康公穆公
子盡力事康公穆公為不負豈必殺身從之遊夫
子乃以侯嬴所為疑三子王澤既未竭君子不為
詭三良殉秦穆要自不得已

和子由聞子瞻將如終南太平宮谿堂讀書

役名則已勤殉身則已媮我誠愚且拙身名兩無謀始
者學書判近亦知問囚但知今當為敢問向所由士方

其未得惟以不得憂既得又憂失此心浩難收譬如倦
行客中路逢清流塵埃雖未脫暫憩得一漱我欲走南
澗春禽始嚶啾軟掌久不決爾來又徂秋橋山日月迫
府縣煩差抽王事誰敢愬民勞吏宜羞中間羅早曠欲
學喚雨鳩千夫挽一木十步八九休渭水涸無泥舊堰
旋挿脩對之食不飽餘事更遑求近日秋雨足公餘試
新筇劬勞幸已過朽鈍不任鏹秋風欲吹帽西阜可縱
遊聊為一日樂慰此百年愁

終南太平宮

揮麈錄祖宗神御像在鳳翔者為上橋清太平宮注詳本卷壬寅二月詩下

山

帝王世紀黃帝葬于上郡陽周之橋山元和郡縣志子午山亦曰橋山在關內道寧州真寧縣東八

十里按宋史仁宗崩于癸卯三月其年挽木宋史本

十月葬永昭陵橋山借以言山陵事傳關中自元昊叛民貧役重岐下歲輸南山木棧自渭入河經砥柱之險衙吏踵破家軾訪其利害為修衙前規使自擇水工以時進止自是害減半

附子由原作

為吏豈厭事厭事日惰媮著書雖不急實與百世謀問吏所事何過客及繫囚客實虛擾人囚有不

自由辦之何益增不辦亦足憂嗟此誰不能脫去
使自收幽幽南山麓下有溪水流溪上亦有堂其
水可濯漱終日不見人惟有山鹿呦是時夏之初
溪冷如孟秋山榲黃笠展林筍紫角抽朝取筍為
羹暮以榲為羞溪魚鯉與魴山鳥鷺與鳩食之飽
且平偃仰自佚休試探篋中書把卷挹前修恍如
反故鄉親朋自相求蔚如甕中糟久熟待一篇為
文若江河豈復有刻鏤尚何憶我為欲與我同遊

我雖不能往寄詩以解愁

將往終南和子由見寄

人生百年寄鬢須富貴何啻葭中草
惟將翰墨留染濡
絕勝醉倒蛾眉扶我今廢學如寒竽
久不吹之澁欲無
歲云暮矣嗟幾餘欲往南溪侶

一作旅

禽魚秋風吹雨涼

生膚夜長耿耿添漏壺窮年弄筆衫袖烏
古人有之我
願如終朝危坐學僧趺閉門不出閒履舄
下視官爵如
泥淤嗟我何為久踟躕歲月豈肯與汝居
僕夫起餐秣

吾駒

卷四

慎按此詩施氏原本不載今因題附編又按
樂城集此詩失原作

讀道藏

嗟予亦何幸偶此琳宮居宮中復何有戢戢千函書盛
以丹錦囊冒以青霞裾王喬掌闕籥蚩尤守其廬乘閒
竊掀攪涉獵豈暇徐至人悟一言道集由中虛心閒反
自照皎皎如芙蕖千歲厭世去此言乃蘧蔭人皆忽其

身治之用土苴何暇及天下幽憂吾未除

道集虛

莊子惟道集虛
虛者心齋也

遽篠

詩疏竹席也晉書皇甫謐自為葬送之制氣絕

以後以遽篠裹尸不用棺槨詩中
正用此事王氏注謂有二義者非

附子由和

道書世多有吾讀老與莊老莊亦已多何況其駢
旁所讀嗟甚少所得半已強有言至無言既得旋
自忘譬如飲醇酒已醉安用漿昔者惠子死莊子
哭自傷微言不復知言之使誰聽哭已輒復笑不

如飲此藏脂牛雜肥犂烹熟有不嘗安得西飛鴻
送弟以與兄

真興寺閣禱雨

太守親從千騎禱神翁遠借一杯清雲陰黯黯將噓遍
雨意昏昏欲醞成已覺微風吹袂冷不堪殘日傍山明
今年秋熟君知否應向江南飽食梗

慎按真興寺閣鳳翔八觀之一也子由賦序
云季夏六月子瞻與張戶曹琥同遊真興寺

晚登寺後重閣東南望五丈原上有白雲
如覆釜慨然思孔明遺跡作書與轍曰可以
賦此則此詩當亦癸卯六月所作施氏原本
不載新刻載續補遺卷中今移編於此

七月二十四日以久不雨出禱磻溪是日宿虢縣
二十五日晚自虢縣渡渭宿於僧舍會閣閣故曾
氏所建也夜久不寐見壁間有前縣令趙薦留名
有懷其人

龕燈明滅欲三更
欹枕無人夢自驚
深谷留風終夜響
亂山銜月半牀明
故人漸遠無消息
古寺空來看姓名
欲向磻溪問姜叟
僕夫屢報斗杓傾

趙薦

詳本集第三卷
和趙薦雪詩

二十六日五更起行至磻溪天未明

夜入磻溪如入峽
照山炬火落驚猿
山頭孤月耿猶在
石上寒波曉更喧
至人舊隱白雲合
神物已化遺蹤蜿
安得夢隨霹靂駕
馬上傾倒天瓢翻

是日自磻溪往陽平憩於麻田青峰寺之下院翠
麓亭

不到峯前寺空來渭上村此亭聊可喜修徑豈辭捫谷
映朱欄秀山含古木尊路窮驚石斷林缺見河奔馬困
嘶青草僧留薦晚殮我來秋日午旱久石牀溫安得雲
如蓋能令雨瀉盆共看山下稻涼葉晚翻翻

陽平

九域志號縣有陽平鎮郭允蹈蜀鑑褒谷西北有古陽平關其地在梁州褒城縣西北今大安

軍五里亦有陽平關頗險要然非舊蹟也

青峯寺

岐山縣志青峯山在縣南一百五十里上有青

翠麓亭

岐山縣志 翠麓亭在縣東南一百八十里青峰禪寺之下

附子由和

走馬紅塵合開懷野寺存南山抱村轉渭水帶沙
渾亭峻朱欄繞堂虛白佛尊煩襟喜修竹倦馬樂
芳蓀白氎柔隨手清泉滿照盆塵顏洗濯淨髀肉
再三捫饋食青蔬軟流匙細粟翻老僧勿施敬對
客說山門

二十七日自陽平至斜谷宿於南山中蟠龍寺

橫槎晚渡碧澗口騎馬夜入南山谷谷中暗水響瀧瀧
嶺上踈星明煜煜寺藏巖底千萬仞路轉山腰三百曲
風生飢虎嘯空林月黑驚麕竄修竹入門突兀見深殿
照佛青燐有殘燭愧無酒食待遊人旋斫杉松煮溪藪
板閣獨眠驚旅枕木魚曉動隨僧粥起觀萬瓦鬱參差
日亂千巖散紅綠門前商賈負椒苐山後咫尺連巴蜀
何時歸耕江上田一夜心逐南飛鵠

蟠龍寺

鳳翔府志蟠龍寺在
郿縣西南三十里

斜谷

元和郡縣志郿縣
亦曰斜城城南當

斜谷因為斜口郭允蹈蜀鑑斜口谷中褒水所流穴
山架木以行長安志褒谷長四百七十里與斜同為

一谷南口曰褒北口曰斜太平寰宇記郿橫槎韋應物詩

縣有斜谷路館驛停廢唐永貞元年重置橫槎

榆柳飄枯葉突兀深殿杜甫詩夜板閣太平寰宇記

風雨倒橫槎突兀深殿杜甫詩夜板閣太平寰宇記

閣二十九百八十九間板山後連巴蜀郭允蹈蜀鑑

閣二十九百九十二間山後連巴蜀郭允蹈蜀鑑

褒斜為前門則南鄭者蜀之扞蔽也南鄭本古褒國

自褒谷至鳳州界一百三十里始通斜谷在郿縣今

附子由和

谷口夜行不見月上下不辨山與谷前呼後應行

相從山頭誰家有遺燭蛩蛩深徑馬蹄響落落稀
星着疎木行投野寺僧已眠叩門無人狗出縮號
呼從者久嗔罵老僧下牀揉兩目問知官吏冒夜
來掃牀延客卧華屋釜中無羹飯實盡餽客滿盎
惟脫粟客來已遠睡忘覺僧起開堂勸晨粥自嗟
奔走閤僧閒偶然來過何年復留詩滿壁待重遊
但恐塵埃難再讀

是日至下馬磧憩於北山僧舍有閣曰懷賢南直

斜谷西臨五丈原諸葛孔明所從出師也

石刻云題合龍

懷賢

閣

南望斜谷口三山如犬牙西觀

石刻作臨

五丈原鬱曲

石刻作屈

如長蛇有

石刻作緬

懷諸葛公萬騎出漢巴吏士寂如水蕭

蕭聞馬搥公才與曹丕豈止十倍加顧瞻三輔間勢若

風捲沙一朝

石刻作奈何

長星墜竟使蜀婦壑山僧豈知此

一室老烟霞往事逐雲散故山依渭斜客來空弔古清

淚落悲笳

下馬磧

九域志鳳翔岐山縣在府東四十里有驛店馬磧二鎮

五丈原

蜀志建興十二年

年諸葛亮悉大衆由斜谷以流馬運據武功五丈原長安志石橋山在岐山縣南三十里渭水所逕其側有五丈原諸葛屯兵處又十里即南山元和郡縣志五丈原在郿縣西南三十五里太平寰宇記引魏氏春秋云青龍二年諸葛出斜谷郭淮策其必登積石原遂先據之亮至不得上因屯渭南司馬懿謂諸將曰亮若出武功依山東轉是其勇也若西屯五丈原諸君無事矣亮果屯此原水經注引武侯與步騭書曰僕前軍在五丈原原在武功西十里馬冢在武功東十餘里有高勢攻之不便是以留耳郭允蹈蜀鑑五丈原在武功故縣

長星墜

蜀志建安十二年八月亮卒于軍中時年五十

四裴松之注亮卒於郭氏塢宋書天文志諸葛亮伐魏屯於渭南有長星赤而芒角西南流投亮營占曰

兩軍相當有大星流來走軍上及墮軍中皆破敗徵也名勝志五丈原西有落星村故山依渭水經注渭水逕武功縣斜水自南注之北歷斜谷逕五丈原諸葛亮與步騭書云水出武功縣亦謂之武功水名勝志渭水北去長安五十里發源鳥鼠山西自郿縣界流入

攬雲篇

余自城中還道中雲氣自山中來如羣馬奔突以手掇開籠收其中歸家雲盈籠開而放之作攬雲篇

物役會有時星言從高駕道逢南山雲歛吸如電過竟誰使令之袞袞從空下龍移相排撓鳳舞或頽亞散為

東郊霧凍作枯樹稼或飛入吾車偪仄入肘膊搏取置笥中提携返茅舍開緘乃放之掣去仍變化雲兮汝歸山無使達官怕

攖雲

莊子攖蓬而指之注音舉方排抄韓愈雪詩崩騰言楚謂取曰攖亦讀上聲相排抄龍鳳交

橫飛

慎按此詩及後一首施氏原本不載外集類編第三卷鳳翔時作也今據此從續補上卷移編

姤佳月

狂雲妬佳月怒飛千里黑佳月了不嗔曾何污潔白爰
有謫仙人舉酒為三客今夕偶不見汎瀾念風伯毋煩
風伯來彼也易滅沒支頤少待之寒空淨無迹粲粲黃
金盤獨照一天碧玉繩慙無輝玉露洗秋色浩瀚玻瓈
淺和光入胸臆使我能永延約君為莫逆

三客

太白詩舉酒邀明
月對影成三人

太白詞並引

岐下頻年大旱禱於太白山輒應故作迎送神辭一
篇五章

雷聞聞山晝晦風振野神將駕載雲罕從玉蚪旱既甚
歷往救道阻修兮

旌旗翻疑有無日慘變神在塗飛赤篆訴閭闔走陰符
行羽檄萬靈集兮

風為幄雲為蓋滿堂爛神既至紛醉飽錫以雨百川溢
施溝渠歌且舞兮

騎裔裔車斑斑鼓簫悲神欲還轟振凱隱林谷執妖厲
歸獻馘千里肅兮

神之來悵何晚山重複路幽遠神之久飄莫追德未報
民之思永萬祀兮

太白神

唐書天寶八載太白山人李渾上言金星洞內有玉版石紀聖皇福壽之符命中丞王珙

往求獲之因御勤政樓大赦封太白山神為神應公
柳宗元祠堂碑序雍州西南界于梁其山曰太白其
地恒寒其人以為神故歲水旱則禱之本集乞封太
白山神狀伏見當府太白山雄鎮一方載在祀典按
唐天寶八年封山神為神應公迨至皇朝始改封侯
而加以濟民之號自去歲九月不雨徂冬及春父老

咸謂此山舊有湫水祈禱必應擇日齋戒既至之日
大雨周飮起二麥于垂枯鬼神雖幽報答甚著若贈
公爵實未為過

慎按此五章施氏原本不載今從全集采出
因地附編

扶風天和寺

遠望若可愛朱欄碧瓦溝
聊為一駐足且慰百回頭
水落見山石塵高昏市樓
臨風莫長嘯遺響別本作
涕記浩難

收

天和寺

扶風縣志天和寺在城南鳳翔志此詩石刻在扶風縣南山馬援祠中先生自題其後云

癸卯九月十六日挈家來遊遺涕石刻作遺響今改正又宋人陳雄題云天和寺在扶風縣之南山蘇公留詩于庭壁迄今二十年矣予承乏斯邑因暇日與絳臺田愿子立洛陽趙卬勝翁同觀愛其真墨之妙慮久而漫滅乃召方渠閻圭公儀就摸于石元豐癸亥六月二十三日終南陳雄仲武題

慎按陳奕禧益州於役記云扶風南山取公

詩首句有遠愛亭今此詩石刻尚存又按此


詩施氏原本不載今據石刻考定年月編癸

卯詩卷末

附子由次韻

樂城集題云次韻子瞻題
扶風道中天和寺小亭

客車來不息轍迹自成溝
莫恠慵登寺猶宜常舉頭
獨遊知憶弟望遠勝登樓
處處題詩徧篇篇誰為收



蘇詩補註卷四

欽定四庫全書

集部
蘇詩補註卷五

詳校官庶吉士_臣李傳熊

檢討_臣何思鈞覆勘

總校官原任光_臣王燕緒

校對官中書_臣牛稔文

謄錄監生_臣范廷驊

欽定四庫全書

蘇詩補註卷五

翰林院編修查慎行撰

古今體詩四十五首

起英宗治平元年甲辰合明年乙巳龍鳳翔仕還朝直史館作

和子由記園中草木十首

煌煌帝王都赫赫走羣彥嗟汝獨何為閉門觀物變微
物豈足觀汝獨觀不倦牽牛與葵蓼采摘入詩卷吾聞
東山傅置酒攜燕婉富貴未能忘聲色聊自遣汝今又
不然時節看瓜蔓懷寶自足珍藝蘭那計畹吾歸于汝

處慎勿嗟歲晚

牽牛

陶弘景曰此藥始出田野人牽牛謝藥故名本草三月生苗作藤蔓繞華牆高二三丈炮炙論

謂之草金鈴酉陽雜俎謂之盆甌草近人隱其名為黑丑以丑屬牛也

葵蓼

爾雅薔戎葵郭璞注

今蜀葵也歐陽詹詩芭蕉一葉妖戎葵一花妍本草蓼有紅白二種秋花經月計畹王逸離騷章句

十二畹
曰畹

荒園無數畝草木動成林春陽一以敷妍醜各自矜蒲
萄雖滿架困倒不能任可憐病石榴花如破紅襟葵花
雖粲粲蒂淺不勝簪叢蓼晚可喜輕紅隨秋深物生感

時節此理等廢興飄零不自由盛亦非汝能

葡萄

漢書作蒲桃張騫自西域歸始得此種

石榴

博物志張騫使西域得塗林安石榴種

以歸故名
安石榴

種柏待其成柏成人已老不如種叢篁春種秋可倒陰
陽不擇物美惡隨意造柏生何苦艱似亦費天巧天工
巧有幾肯盡為汝耗君看藜與藿生意常草草

篁

爾雅箭王篁郭璞注王帚也似藜其樹可以為掃篁海東呼為落帚

萱草雖微花孤秀能自拔亭亭亂葉中一一勞心插牽

牛獨何畏詰曲自牙藥走尋荆與榛如有夙昔約南齋
讀書處亂翠曉如潑偏工貯秋雨歲歲壞籬落

萱

大觀本草萱本作護鄭樵通志謂萱草一名合歡者訛

蘆筍初似竹稍開葉如蒲方春節抱甲漸老根生鬚不
愛當夏綠愛此及秋枯黃葉倒風雨白花搖江湖江湖
不可到移植苦勤劬安得雙野鳴飛來成畫圖

蘆筍

爾雅葍蘆筍其萌蘆注云今江東呼蘆筍蘆音拳

行樂惜芳晨秋風常苦早誰知念離別喜見秋瓜老秋

瓜感霜霰莖葉蜨已槁宦遊歸無時身若馬繫卑悲鳴
念千里耿耿志空抱多憂竟何為使汝玄髮縞

官舍有叢竹結根問囚廳下為人所徑土密不容釘殷
勤戒吏卒挿棘護中庭遶砌忽墳裂走鞭瘦玲峴我常
攜枕簟來此蔭寒青日暮不能去卧聽窗風冷

芎藭生蜀道白芷來江南漂流到關輔猶不失芳甘濯
濯翠莖滿悵悵清露涵及其未花實可以資筐籃秋節
忽已老苦寒非所堪斲根取其實對此微物慙

芎藭

大觀本草芎藭一名山鞠藭出蜀中者名川芎

白芷

本草芷一名葍許氏說文晉謂之葍

齊謂之蒹楚謂之薺生於下澤故有澤芬之名

自我來關輔南山得再遊山中亦何有草木媚深幽
蒲人不識生此亂石溝山高霜雪苦苗葉不得抽
下有千歲根蹙縮如蟠蚪長為鬼神守德薄安敢偷

德薄

法華經德薄之人不種善根抱朴子仙藥篇凡庸道士心不專精行穢德薄是終不能得也

野菊生秋澗芳心空自知無人驚歲晚惟有暗蛩悲
花開澗水上花落澗水湄菊衰蛩亦蟄與汝歲相期
楚客

方多感秋風咏江籬落英不滿掬何以慰朝饑

慎按樂城集記園中所有止十首先生和詩
刻本皆作十一首蓋譌入紀夢一首耳今改

正

附子由原作十首

自注云時
在京師

萱草朝始開呀然黃鵠背仰吸日出光口中爛如
綺纖纖吐須鬣冉冉隨風哆朝陽未上軒粲粲幽
閒女美人生山谷不解歌與舞君看野草花可以

解憂悴

寒地竹不生雖生常若病
斲根種幽砌開葉何以
猛嬋娟冰雪姿散亂風日影
繁華見孤淡一箇敵
千頃令人憶江上森聳緣崖勁
無風籜自飄策策
鳴荒徑

蘆生井欄上蕭騷大如竹
移來種堂下何爾短局
促莖青甲未解枯葉已可束
蘆根愛溪水餘潤長
鮮綠強移性不遂灌水惱童僕
晡日下西山汲者

汗盈掬

堂後病石榴及時亦開花身病花不齊火候漸已
差芳心竟未已新萼綴枯槎誰言石榴病乃久占
年華鄰家花最盛早發豈容遮殘紅已零落婀娜
子如瓜

蒲桃不禁冬屈盤似無氣春來乘盛陽覆架青綾
被龍鬚亂無數馬乳垂至地初如早梅酸晚作釀
酪味誰能釀為酒為爾架前醉滿斗不與人涼州

幾時致

室幽來客稀塵土積不掃鄰翁笑我拙教我種叢
草經霜斫為簣不讓秋竹好始生如一毛張王忽
侵道鉏耰禁芟斲愛惜待枯槁有用皆勿輕吾師
灌園老

吾兄客闕中果羸施吾宇兄雖未得還我豈如婦
女呦呦感微物涕泗若零雨但愛果羸莖屈曲上
墻堵朝見緣墻頭暮已過墻去物生隨年華還日

何足數

牽牛非佳花走蔓入荒榛
開花荒榛上不見細蔓
身誰翦薄素紗浸之青
藍盆水淺浸不盡下餘
一寸銀嗟爾脆弱草豈能
凌霜晨物性有稟受安問
秋與春

南園地性惡雙柏不得長
蓬麻春始生今已滿一
丈柏生嗟幾年失意自悽
愴有子壓枝低已老非
少壯尤柏柏已冤尤地亦
恐忘兩既無所尤高枝

幾時放

葵花開已闌結子壓枝重長條困風雨倒卧枕丘
壟憶初始放花岌岌旌節聳得時能幾時狼藉成
荒冗浮根不任雪采剝收遺種未忍焚枯莖積疊
牆角擁

紀夢

我歸自南山山翠猶在目心隨白雲去夢繞山之麓汝
從何方來笑齒粲如玉探懷出新詩秀語奪山綠覺來

已茫昧但記說秋菊有如採樵人入洞聽琴筑歸來寫

遺聲猶勝人間曲

公自注八月十一日夜宿府學方和此詩夢與弟游南山出詩數十首夢

中甚愛之及覺但記一句云蟋蟀悲秋菊

笑齒燦如玉

李白詩榮然啓玉齒授我煉藥說

附子由和

藥城集原題和子瞻紀夢

兄從南山來夢我南山下探懷出詩卷卷盈君

把詩詞古人似弟則吾弟也相與千里隔安得千

里馬攜手上南山不知今乃夜晨雞隔牆唱歌枕

窗月亞百語記一詞秋菊悲蛩吒此語鮑謝流平
日我不暇我本無此詩嗟此誰所借

和子由種菜久旱不生

新春堦下筍芽生厨裏霜蟄倒舊罌時繞麥田求野薺
強為僧舍煮山羹園無雨潤何須歎身與時違合退耕
欲看年華自有處鬢間秋色兩三莖

慎按此詩施注原本新刻本俱失載考之藥
城集先生和詩當在鳳翔官舍作今從別本

補編

附子由原作

久種春蔬旱不生園中汲水亂鉚罌松葵經火未
出土僮僕何朝飽食羹強有人功趨令節悵無甘
雨困耘耕家居閒暇厭長日欲看年華上菜莖

大老寺竹間閣子

殘花帶葉暗新筍出林香但見竹陰綠不知汧水黃樹
高傾隴鳥池浚落河魴栽種良辛苦孤僧瘦欲狂

大老寺

大老一本作天花一本作天和鳳翔志竹閣在城東北三里唐光啟中李茂真建後為大

老寺當

沂水

鳳翔縣志在縣西一十里由沂陽縣西又南流入寶雞

從志

慎按此詩施氏原本不載新刻載續補下卷

据外集以為鳳翔時作今從之

周公廟廟在岐山西北七八里廟後百許步有泉

依山湧洌異常國史所謂潤德泉世亂則竭者也

吾今那復夢周公尚喜秋來過故宮翠鳳舊依山碑兀

清泉長與世窮通至今游客傷離黍故國諸生咏雨濛

牛酒不來烏鳥散白楊無數暮號風

周公廟

岐山縣志周公廟在縣西北十五里鳳鳴山下名勝志鳳山之麓有周公廟廟前有篁竹園圍

內有泉引泉入池曰不溢池

翠鳳

竹書紀年周文王元年有鳳集于岐山國語周之興也驚驚鳴

于岐山水經注天柱山有鳳皇祠太平寰宇記岐山一名天柱時人謂此山為鳳凰堆

潤德泉

岐山縣志泉在周公廟東唐鳳翔節度使崔珙奏岐山縣棲鳳鄉周公廟舊有泉水枯竭多年去冬十一月十七日忽因大風其泉五處一時湧出各深一尺詢諸故老咸稱此泉出必時泰歲豐者請宣示史官以光典冊詔答云朕以虛庸敢膺玄覽披圖見瑞省表增慚今賜名潤德泉湘山野錄雍熙二年鳳翔奏周公廟有泉湧出相傳時平則流亂則竭唐大中年復流賜號潤德後又涸今其泉復涌澄瑩甘潔太宗

號功德泉

附子由次韻

周人尚記有周公
禾黍離離下有宮
破豆烝豚非以報
野巫長跪若為通
山園棟宇泉流近
鳳去梧桐落葉濛
有客賦詩題屋壁
二南猶自有遺風

嵇紹似康

并引一本題云
戲作賈梁道詩

王凌謂賈充曰汝非賈梁道之子耶乃欲以國與人
由是觀之梁道之忠於魏也久矣司馬景王既執凌

歸過梁道廟凌大呼曰我亦大魏之忠臣也及司馬
病見凌與梁道守而殺之二人者可謂忠義之至精
貫於神明矣然梁道之靈獨不能已其子充之姦至
使首發成濟之事此又理之不可曉者也故予戲作

詩云

嵇紹似康為有子
郝超叛鑒似無孫
如今更恨賈梁道
不殺公閭殺子元

成濟事

晉書賈充傳高貴鄉公之攻相府也充率衆
拒戰于南闕軍將敗成濟謂充曰今日之事

何如充曰公養汝正為今日
復何疑于是濟抽戈犯蹕

慎按三國魏志王凌謂齊王不任天下欲迎立楚王
彪遣揚弘以廢立事告兗州刺史黃華華弘以白司
馬宣王宣王將兵討之凌勢窮自縛出迎宣王承詔
送京師凌至項飲藥死干寶晉紀曰凌到項見賈逵
祠呼曰賈梁道王凌固忠於魏之社稷者唯汝有神
知之其年八月宣王有疾夢凌遠為厲遂寤據此則
親王凌者乃仲達非子元也王應麟困學紀聞云王
凌以壽春欲誅懿而不得此其証也先生蓋訛記為
景王事故恨梁道不殺公閭而殺子
元耳從來注家無有辨者今駁正

慎按此詩施氏原本不載外集編第三卷鳳
翔時作也今據此從新刻續補下卷移編

南溪之南竹林中新構一茆堂予以其所處最為
深邃故名之曰避世堂

猶恨溪堂淺更穿修竹林高人不畏虎避世已無心
隱几類如病忘言兀似一作自瘖茆茨追上古冠蓋謝當今

曉夢猿呼覺秋懷鳥伴吟暫來聊解帶屢去欲攜衾
湖上行人絕堦前暮雪深應逢綠毛叟扣戶夜抽簪

避世堂

名勝志在藍屋縣
東南二十五里

附子由次韻

拄杖行窮徑園堂尚有林飛禽不驚處萬竹正當
心虎嘯風吹籟霜多蟬病瘖獸驕從不避人到記
由今未暇終身住聊為半日吟青松可絕食黃葉
不須食偶到初迷路將還始覺深堂中有幽士挿
髻尚餘簪

重遊終南子由以詩見寄次韻

去年新柳報春回今日殘花覆綠苔溪上有堂還獨宿
誰人無事肯重來古琴彈罷風吹座山閣醒時月照杯

嬾不作詩君錯料舊逋應許過時陪

溪堂

在南溪上注見壬寅二月詩公自注中

附子由原作

終南重到已春回
山木緣崖綠似苔
谷鳥鳴呼嘲獨往
野人笑語記曾來
定邀道士彈鳴鹿
誰與溪堂共酒盃
應有新詩還寄我
與君和取當遊陪

自清平鎮遊樓觀五郡大
秦延生僊遊往返四日
得十一詩寄舍弟子由同作

按樂城集題云和子瞻三遊南山九首自

樓臺至玉女洞止此外又有調水符
姚氏山亭二首合成十一首之數

樓觀

鳥噪猿呼晝閉門寂寥誰識古皇尊青牛久已辭轅軻

白鶴時來

一作來時

訪子孫山近朔風吹積雪天寒落日淡

孤村道人應怪遊人衆汲盡堦前井水渾

清平鎮

按九域志郿縣有清秋鎮
注見前此云清平失考

附子由次韻

神仙避世守闕門一世沉埋百世尊舊宅居人無

姓尹深山道士即為孫天寒遊客常逢雪日暮歸
鴉自識村君欲留身記幽寂直將山外比羗渾

五郡

古觀正依林麓斷居民來就

一作說

水泉甘亂溪赴渭爭

趨北飛鳥迎山不復南羽客衣冠朝上象野人香火祝

春蠶汝師豈解言符命山鬼何知託老聃

公自注觀有明皇碑言夢

老子告以享國長久之意

五郡

名勝志蓋屋縣有五郡城舊說有兄弟五人並居此後為道觀唐鑒碑

山鬼

史記始皇

本紀山鬼不過
知一歲事耳

附子由次韻

蜀人不信秦川好
食蔗從梢未及甘
當道沙塵類
河北依山水竹似江南
觀形隨阜飲溪鹿雲氣侵
山食葉蠶猶有道人迎
客笑白須黃袖豈非聃

授經臺

公自注乃南山一
峰耳非復有築處

劍舞有神通
草聖海山無事化
琴工此臺一覽秦川小
不待傳經意已空

授經臺

名勝志在鳳翔城南崇聖觀在其側秦川地理尹喜既見老子授五十言退而居此

志陸川陝之平川盡處過此而東則雍之秦川也

附子由和

輪扁不能令子巧老聃雖智若為傳遺經尚在臺
如故弟子今無似喜賢

大秦寺

晃蕩平川盡坡陀翠麓橫忽逢孤塔迥獨向亂山明信
足幽尋遠臨風却立驚原田浩如海滾滾盡東傾

大秦

法苑珠林終南山有大秦嶺竹林寺

原田

鄭康成詩箋周原在岐山之南史記徐廣音義

岐山在扶風其南有周原名勝志周原在岐山縣東四十里東西橫亘肥美寬平即詩周原膍膍者也地在岐山之陽故左傳曰成有岐陽之蒐

附子由和

大秦遙可說高處見秦川草木埋深谷牛羊散晚

田山平堪種麥僧魯不求禪北望長安市高城遠

似烟

仙遊潭五首

公自注潭上有二寺一在潭北循黑水上為東路至南寺渡黑水西里

餘從馬北上為西路至北寺東路險不可騎馬而
西路隔潭潭水深不可測上以一木為橋不敢過
故南寺有塔望之
可愛而終不能到

潭

翠壁下無路何年雷雨穿光搖巖上寺深到影中天我
欲然犀看龍應抱寶眠誰能一作言孤石上危坐試僧禪

附子由和

潭深不可涉潭小不通船路斷遊人止龍藏白沫
旋翦藤量水短挿石置橋堅橋外居民少躬耕不

用錢

南寺

東去愁攀石西來怯渡橋
碧潭如見試白塔苦相招
野饋慚微薄村沽慰寂寥
路窮斤斧絕松桂得干霄

野饋

詩七月疏
餽野饋也

附子由和

澄潭下無底將渡又安能
慣上橫空木輕生此寺僧
曉魚聞考考石塔見層層
不到殊非惡他年記

未曾

北寺

唐初傳有此亂後不留碑畏虎闔門早無村得米遲山
泉自入甕野桂不勝炊信美那能久應先學忍饑

附子由和

君看潭北寺何用減潭南不到還能止重來獨未
厭荒涼增客思貧病覺僧慚飲水寒難忍誰言柏
子甘

馬融石室

未應將軍聘初從李直游絳紗生不識蒼石尚能留豈
害依梁冀何須困李侯吾詩慎勿刻猿鶴為君羞

將軍聘

後漢馬融傳永初二年大將軍鄧騭聞融召為舍人非其好也而不應命既饑困乃悔而嘆

息往應召

從李直游

本傳初京兆摯恂以儒學教授隱於南山融從其游學博通經籍李直恂

字也絳紗

鳳翔志馬融扶風人今縣東南二十里有絳帳村

依梁困李

本傳融鬱于鄧

氏不敢復違忤勢家遂為梁冀草奏李固以此為正直所羞

附子由和

扶風貴公子早歲伴山家
吹笛墮秋葉讀書隨曉
鴉業成心自叛學苦我
長嗟石室非人住窮山
雪似沙

玉女洞

洞裏吹簫子終年守獨幽
石泉為曉鏡山月當簾鉤
歲晚杉楓盡人歸霧雨愁
送迎應鄙陋誰繼楚臣謳

附子由和

洞門蒼蘚合偏仄不容身
傳有虛明處中藏窈窕

人吹笙橋上月拾翠洞南春徃徃來山下蕭然雨
灑塵

愛玉女洞中水既致兩瓶恐後復取而為使者
見絳因破竹為契使寺僧藏其一以為徃來之
信戲謂之調水符

欺謾久成俗闕市有契繻誰知南山下取水亦置符古
人辨淄澠皎若鶴與鳬吾今既謝此但視符有無常恐
汲水人智出符之餘多防竟無及棄置為長吁

附子由和

多防出多欲欲少防自簡君看山中人老死竟誰
謾渴飲吾井泉饑食甑中飯何用費卒徒取水負
瓢罐置符未免欺反覆慮多變授君無憂符堦下
泉可嚙

自仙遊回至黑水見居民姚氏山亭高絕可愛
復憇其上

山鵝曉辭谷似報遊人起出門猶屢顧慘若去吾里道

途險且迂繼此復能幾溪邊有危構歸駕聊復柅愛此
山中人縹緲如仙子平生慕獨往官爵同一屣胡為此
溪邊眷眷若有俟國恩久未報念此慙且泚臨風浩悲
吒萬世同一軌何年謝簪紱丹砂留迅晷

黑水

谷名注見第三卷壬寅二月詩公自注中

南溪有會景亭處衆亭之間無所見甚不稱其名
予欲遷之少西臨斷岸西向可以遠望而力未暇
特為製名曰招隱仍為詩以告來者庶幾遷之

飛簷臨古道高榜勸遊人未即令公隱聊須濯路塵
茆茨分聚落烟火傍城闔林缺湖光漏窗明野意新
居民惟白帽過客漫朱輪山好留歸屐風迴落醉巾
他年誰改築舊製不須因再到吾雖老猶堪作坐賓

附子由次韻

隱居吾未暇何暇勸夫人試飲此亭酒自慚纓上
塵林深開翠帟岸斷峻巖闔送雪村沽醖迎陽鳥
弄新竹風吹斷籟湖月轉車輪霜葉飛投坐山梅

重壓巾欲居常有待已失嘆無因古語君看取聲
名本實賓

凌虛臺

才高多感激道直無往還不如此臺上舉酒邀青山青
山雖云遠似亦識公顏崩騰赴幽賞披豁露天慳落日
銜翠壁暮雲點烟鬟浩歌清興發放意末禮刪是時歲
云暮微雪灑袍斑吏退迹如掃賓來勇躋攀臺前飛雁
過臺上雕弓彎聯翩向空墜一笑驚塵寰

凌虛臺

本集凌虛臺記畧云四方之山莫高於終南而都邑之最麗者莫近於扶風以至近求至

高其勢必得此凌虛之所為作也○慎按即博聞見後錄云東坡作凌虛臺記陳公弼覽之笑曰吾視蘇明允猶子也其猶孫子也平日故不以辭色假之者以其年少暴得大名懼夫滿而不勝也乃不吾樂耶不易一字即命刻之石其後公弼坐臙抑鬱以沒至謂東坡致使然云云此事之未必然者予於客位假寐詩註中辨之詳矣

附子由次韻

棄我謂我遠求我謂我還我一爾則二視此臺上
山山高上千天獨不照我顏無乃我自蔽誰謂山

則慳遠望不見趾近視不得鬟山實未始變任子
自擇刪北風吹南崖山上秋葉斑道遠又寒苦皴
裂辭難攀晴空卷朝雲照夜霜月彎強爾登此臺
勉矣趨闌關

竹騶

一作
騶

野人獻竹騶腰腹大如盎自言道旁得采不費置網鳩
夷讓圓滑混沌慙瘦爽兩牙雖有餘四足僅能髣逢人
自驚蹶悶若兒脫襁念此微陋質刀几安足枉就擒大

倉卒羞愧不能饗南山有孤熊擇獸行舐掌

竹鼯

陸佃埤雅栗鼠若竹鼯之類蓋鼠食竹故曰竹鼯燕山錄云煮羊以鼯即此也

附子由次韻

野食不穿困溪餘不盜盜嗟鼯獨何罪膏血自為
網陰陽造百物偏此愚不爽肥癡與瘦黠稟受不
相髣王孫處深谷小若兒在襁超騰避彈射將中
還復枉一朝受羈縲冠帶相賓饗愚死智亦擒臨
食抵吾掌

漢陂魚

公自注陂在鄆縣

霜筠細破為雙掩中有長魚如卧劍紫符穿腮氣慘悽
紅鱗照座光磨閃攜來雖遠鬣尚動烹不待熟指先染
坐客相看為解顏香粳飽送如填塹早歲嘗為荆渚客
黃魚屢食沙頭店濱江易採不復珍盈尺輒棄無乃僭
自從西征復何有欲致南烹嗟久欠游鯈瑣細空自鯉
亂骨縱橫動遭砭故人遠餽何以報客俎久空驚忽瞻
東道無辭信使頻西鄰幸有庖鼈醢

漢陂魚

元和郡縣志漢陂在鄠縣西五里周圍十四里長安志出終南山諸谷合胡公泉為陂十

道志地有五味陂產魚甚美因名之唐寶歷間勅漢陂令尚食禁采捕

雙掩

掩揜同曲禮大夫不

揜羣石經作掩蓋襲取之義今用為魚具之名

沙頭

在荊州註詳第二卷中

附子由次韻

漢陂霜落魚可掩枯茨破盤蒲折劍巨斧敲冰已

暗知長叉刺浪那容閃鯨孫鮫子誰復惜朱鬣金

鱗漫如染邂逅相遭已失津偶然一掉猶思塹嗟

君遊宦久羊炙有似遠行安野店得魚未熟口流

誕豈有哀矜自欺僭人生飽足百事已美味那令
一朝欠少年勿笑貪乞筋老病行看費鍼砭羊生
懸骨空自饑伯夷食菜有不贍清名驚世不益身
何異飲醯徒酷齏

十二月十四日夜微雪明日往南溪小酌至晚

南溪得雪真無價走馬來看及未消獨自披榛尋履迹
最先犯曉過朱橋誰憐破屋眠無處坐覺村飢語不囂
惟有暮鴉知客意驚飛千片落寒條

附子由次韻

南溪夜雪曉來霽有客晨遊酒未消風泛餘花來
逐馬浮光斷澗不知橋山寒凍合行人息醉熟賓
歡舞意囂歸騎相將踏瑤玉嗅林間認早梅條
九月中曾題二小詩于南溪竹上既而忘之昨日
再遊見而錄之

湖上蕭蕭疎雨過山頭靄靄暮雲橫陂塘水落荷將盡
城市人歸虎欲行

誰謂江湖居而為虎豹宅焚山豈不能愛此千竿碧

司竹監燒葦園因召都巡檢柴貽勗左藏以其徒

會獵園下

官園刈葦留枯槎

留枯槎別本皆作歲留槎

深冬放火如紅霞枯槎

燒盡有根在春雨一洗皆萌芽黃狐老兔最狡捷賣侮百

獸常矜誇年年此厄竟不悟但愛蒙密爭來家風迴蝕

卷毛尾熟欲出已被蒼鷹遮野人來言此最樂徒手曉

時一作出歸滿車巡邊將軍在近邑呼來颯颯從矛叉戍

兵久閒可小試戰鼓雖凍猶堪搥雄心欲搏南澗虎陣
勢頗學常山蛇霜乾火烈聲暴野飛走無路號且呀迎

人截來砮

一作苦

逢箭避犬

一作火者說

逸去窮投置擊鮮走

馬殊未厭但恐落日催棲鴉弊旗仆鼓坐數獲鞍挂雉
兔肩分麇主人置酒聚狂客紛紛醉語晚更譁燎毛燔
肉不暇割飲啖直欲追羲媧青丘雲夢古所咤與此何
啻百倍加苦遭諫疏說夷羿又被詞客嘲淫奢豈如閒
官走山邑放曠不與趨朝衙農工已畢歲云暮車騎雖

少賓珠嘉酒酣上馬去不告獵獵霜風吹帽斜

司竹監

漢書注芒竹在藍屋南界芒水之曲而多竹林也水經注芒水又北徑藍屋縣之竹園漢

冲帝詔曰翟義作亂於東霍負倚芒竹即此也元和郡縣志司竹園周迴百里置監丞掌之唐六典司竹

監掌植養園竹之事其管內及有司所頒簾籠筐篚之屬擇其有幹以供之按漢書有司竹長丞後魏有

司竹都尉後周有司竹監及丞唐因之在京兆郭藍屋懷州河內界中宋時惟郭藍屋一監在鳳翔左

藏咸淳臨安志左藏掌受四方財賦之以待邦國之經費其原蓋起於周職內職歲外府之職漢更

隸大農少府至晉始置左右藏分建東西庫宋初左藏止一庫置使領焉率居以清望官其後惟才是用

四選通巡邊將軍宋史職官志諸縣有巡檢司掌訓得入轄巡邊將軍治甲兵巡邏州邑擒捕盜賊有沿

邊溪洞都巡檢或蕃漢都巡檢孫彥同職官分紀嘉祐三年詔諸路每一州軍巡檢有至三五員者又兩三州至八九州有都同巡檢軍馬勢分罕能獲賊其一州軍止留巡檢一員數州留都同巡檢一員其邊海江湖險僻之地舊有巡檢處皆留之

附子由和

駿馬七尺行馮馮曉出射獸霜為冰荻園斫盡有
枯枿束茆吹火初如燈乍分乍合勢開展蒼烟被
野風騰騰黃狐驚顧嘯儔侶飛鳥先起如蒼蠅須
臾列旆布行伍有似修蟒橫岡陵蒼鷹猛犬出前

後缺處已挂黃麻罽回風忽作火力怒平地一捲
無疆塍商辛不出抱寶死曹瞞逸去焦其肱投身
互喜脫灰燼闖首旋已遭侵凌何人上馬氣吞虎
狐帽壓耳皮蒙膺開弓徐射疊雙兔擁馬謹叫驚
未曾舉鞭一麾百夫進擊鼓再發箭啓棚去如飛
室中如電獲若雨獸膏流澠肉分麾下飽壯士皮
與公子留縑繒縱橫分裂惠村塢尚有磊落載後
乘吾兄善射久無敵是日斂手稱不能憑鞍縱馬

聊自適酒後醉語誰能磨健兒擊搏洵可樂主將
雄猛今誰勝胸中森列萬貔虎嗟世但以文儒稱
安得強弓傅長箭使射蔽日垂天鵬

和子由木山引水二首

蜀江久不見滄浪江上枯槎遠可將去國尚能三犢載
汲泉何愛一夫忙崎嶇好事人應笑冷淡為歡意自長
遙想納涼清夜永窗前微月照汪汪

慎按第一首與樂
城集用韻不同

千年古木卧無梢浪捲沙翻去似瓢幾度過秋生鮮暈
至今流潤應江潮泫然疑有蛟龍吐斷處人言霹靂焦
材大古來無適用不須鬱鬱慕山苗

附子由原作

引水穿墻接竹梢谷藏峯底大容瓢將流旋滴廬
山瀑已盡還來海上潮亂點落池驚睡覺半山含
潤沃心焦瓦盆一斛何勝滿溢去猶能浸菊苗
簷下枯槎拂荻梢山川迢遞費公瓢幽泉細細流

巖鼻盆水瀾瀾漲海潮但愛堅如湖上石誰憐收
自竈中焦蒼崖寒溜須佳蔭尚少冬青石璽苗

和子由苦寒見寄

按樂城集
缺原作

人生不滿百一別費三年三年吾有幾棄擲理無還長
恐別離中推我鬢與顏念昔喜著書別來不成篇細思
平時樂乃為憂所緣吾從天下士莫如與子歡羨子久
不出讀書蟲生羶丈夫重出處不退要當前西羌解仇
隙猛士憂塞壩廟謀雖不戰虜意久欺天山西良家子

錦緣貂裘鮮千金買戰馬百寶粧刀鏢何時逐汝去與虜試周旋

三年

先生於嘉祐辛丑十一月赴鳳翔任又三年為英宗治平元年甲辰按傅藻紀年錄是冬任滿

還朝此詩乃將離鳳翔時作故有一別費三年之句施氏原本編入第一卷蠶市詩後訛矣今改正西

羗解仇

按東都事畧嘉祐六年趙諒祚上書慕中國衣冠明年當以迎漢使者仁宗許之至治平

三年復舉兵犯慶州又寇大順城先生作詩在治平初其時諒祚尚未渝盟而逆料虜情固知其必叛矣

寄題興州鼂太守新開古東池

百畝清

一作新

池傍郭斜居人行樂路人誇自言官長如

靈運能使江山似永嘉縱飲座中遺白蛤幽尋盡處見
桃花不堪山鳥號歸去長遣王孫苦憶家

興州

太平寰宇記山南西道興州白馬氏之東境漢分置武都郡按今州則武都之沮縣也晉以後

為楊茂搜所据後魏改東益州廢帝改興州地當入蜀要衝東北至長安九百五十里九域志利州路興

州順政郡在興元府成階鳳三州之間今漢中府興安州是也鼉太守名仲約司馬溫公集有寄

題興州晁都官仲約東沼沼上有唐鄭都官詩刻石又文與可丹淵集詩序云余過興州太守晁侯延之

於東池晴麗亭且道其所以為此池亭之意余賦詩云鄭谷題詩處荒涼不復知使君來問日景物欲歸

時
靈運永嘉

元和郡縣志溫州永嘉郡漢會稽東部之地晉大寧中置永嘉郡唐上元二年

於永嘉縣置温州太平寰宇記永嘉有南亭北亭白
岸亭楠溪石帆石室謝公池謝公巖諸名勝靈運皆
詩有

附鄭谷興州東池原作

南連乳郡流潤碧浸晴樓徹底千峯影無風一片
秋垂楊拂蓮葉返照媚漁舟鑑貌還惆悵難遮兩
鬢羞

附司馬君實作

名郎遊勝地心迹繼風流昔為題詩著今因好事

修四山相照映五馬屢淹留相見波光淨依然一
片秋

附子由作

山繞興州萬疊青池開近郭百泉并昔年種柳人
何在累歲開花藕自生波暖跳魚聞樂喜人來野
鴨望船鳴西還過此須終日為問使君行未行
華陰寄子由

三年無日不思歸夢裏還家旋覺非臘酒送寒催去國

東風吹雪滿征衣三峯已過天浮翠四扇行看日照扉
里堠消磨不禁盡速攜家餉勞驂駢

華陰

元和郡縣志華州華陰縣漢屬弘農郡太華山在縣南八里輿地廣記禹貢華陰之地秦更名

秦寧漢高八年改為華陰縣

三峯

名山記華岳有三峯直上數千仞基廣而峯峻有如削成今博

山香爐形寶象之

四扇

韓愈詩荆山已過華山來日出潼關四扇開

和董傳留別

麤繒大布裹生涯腹有詩書氣自華厭伴老儒烹瓠葉
強隨舉子踏槐花囊空不辦尋春馬眼亂行看擇壻車

得意猶堪誇世俗詔黃新濕字如鴉

董傳

本集與韓魏公尺牘云進士董傳至長安見軾於官舍道其窮苦之狀賴公而存又薦我於朝

吾生平無妻有彭駕部者許嫁我以妹云云按先生作此詩時傳已病歿則其生前未嘗娶婦故詩中有眼亂行看擇大布陶潛詩御冬足大腹有詩書韓愈

瘠車之句

大布

陶潛詩御冬足大布麤絺以應陽

腹有詩書

韓愈

腹有詩書擇壻

中培詩說標有梅女父擇壻之詩

詔黃

南史王韶之傳遷黃門侍郎領著作

凡諸詔黃皆其辭也王楙野客叢書唐中書制詔畫旨而施行者曰勅用黃麻紙承旨而行者曰勅牒用

黃藤紙

西蜀楊耆二十年前見之甚貧今見之亦貧所異

於昔者蒼顏華髮耳女無美惡富者妍士無賢不
肖貧者鄙使其逢時遇合豈減當世之士哉頃宿
長安驛舍聞泣者甚怨問之乃昔富而今貧者乃
作一詩今以贈楊君

孤村漸

一作微

雨逐

一作送

秋涼逆旅愁人怨夜長不寐相

看惟櫪馬悲歌

一作愁吟

互答有寒螿天寒滯穗

石刻作穗

猶橫

一作棲

畝歲晚空機任

石刻作尚

倚墻勸爾一杯聊復睡人間

貧富海茫茫

慎按此詩施氏原本不載本詩有石刻題云
余三十年前雨過扶風夜半逆旅有歌者其
聲悲甚起問之蓋昔富今貧者予亦為悽然
飲之以酒而作此詩今日寒雨不止忽憶此
事且念楊君之悽屑與逆旅者何異故書以
與之云云與刻本小異故附錄於此按先生
宦蹟自後不復入秦故知此詩為此時作今
從新刻續補下卷移編

夜直秘閣呈王敏甫

蓬瀛宮闕隔埃氛，帝樂天香似許聞。
瓦弄寒蟬鴛鴦卧，月樓生晴靄鳳盤雲。
共誰交臂論今古，只有閒心對此君。
大隱本來無境界，北山猿鶴漫移文。

直秘閣

文獻通考太平興國二年始建崇文院端拱初建秘閣亦在崇文院中孫彥同職官分紀

端拱元年置秘閣每夜輪校理校勘一人直宿曾肇
隆平集秘閣初隸京百司淳化元年秘書監李至上
言乞與三館同列不隸京百
司詔自今秘閣宜次三館

慎按宋時秘閣之秩視三館較卑三館者昭

文集賢史館也以先生墓誌考之英宗治平
二年公自鳳翔罷還召試秘閣入三等得直
史館未幾丁老蘇公憂元祐初自登州還朝
除起居舍人繼除中書舍人前後歷官未嘗
授秘閣之秩題中所云直秘閣疑當作直史
館此詩施氏原本不載今據外集從續補卷
中移編

謝蘇自之惠酒

高士例須憐麴蘖此語嘗聞退之說我今有說殆不然
麴蘖未必高士憐醉者墜車莊生言全酒未若全於天
達人本自不虧缺何暇更求全處全景山沉迷阮籍傲
畢卓盜竊劉伶顛貪狂嗜怪無足取世俗喜異矜其賢
杜陵詩客尤可笑羅列八子參羣仙流涎露頂置不說
為問底處能逃禪我今不飲非不飲心月皎皎長孤圓
有時客至亦為酌琴雖未去聊忘絃吾宗先生有深意
百里雙嬰遠將寄且言不飲固亦高舉世皆同吾獨異


不如同異兩俱冥得鹿亡羊等嬉戲決須飲此勿復辭
何用區區較醒醉

蘇自之

致失心月

傳燈錄心月孤
圖光吞萬象

慎按此詩施氏原本不載外集編第四卷自
鳳翔還朝直史館時所作今據此從新刻續
補上卷移編於此



蘇詩補註卷五